

之時似當立廟祭之然止發於一時則立壇亦為便益以古事見之武王不豫周公請命不於廟而以壇周公之聖豈不知廟以祭之而必於壇祭之者只在致誠而已然自上憂念至此請與大臣議之且臣等聞之平安道人民閭閻家皆死則兒子及老人無所護養因而致死以此死亡之數尤多誠可哀矜請下書于觀察使使之撫恤何如傳曰祭祀果在於誠而不在于立廟設壇也且兒子無救護而死者可哀憐亦當下書○下書于平安道觀察使金克成曰道內癘疫之家家長俱役則老幼雖存隣里族親憚於傳染不肯往救扶護迫於飢寒而死者豈無其人言念及此痛傷于懷卿其體予至懷特令所在守令官給衣糧使之撫養毋致橫夭○臺諫啓前事不允○以曹繼商為刑曹判書韓承貞為司諫院司諫趙琛為世子侍講院輔德沈彥慶為司憲府掌令朴紹為文學○日暈兩珥○夜異乃有氣如火○黃海道白川載寧鳳山黃州兩雷○壬午御朝講持平黃允峻正言安士彥論前事不允○下新抄辟瘟方于政院曰此方書藥名甚多依前例諺解印出可也但待印出則似乎遲緩姑傳寫並辟瘟藥下送于咸鏡平安等道且印出辟瘟方宜令邑奉旨略序首尾於篇末使後世知某時所著前有辟瘟方此則